

# Vischnaunca politica Andiaast

## Radunonza communal dils 5 da december 2014

Presents: Suprastonza communal e 12 vischinas e vischins  
Perstgisas: Tarcisi Dietrich ed Ignaz Alig

### 1. Beinvegni ed elecziun dils dumbravuschs

President communal Sievi Sgier fa in cordial beinvegni tier las fatschentas publicadas. Sco dumbravuschs vegnan Rico Schlosser ed Arno Capaul proponi ed elegi unanimamein. Encunter la gliesta da tractandas dat ei neginas objecziuns.

### 2. Prelecziun ed approvaziun dil protocol dils 31-10-2014

Il protocol dalla davosa radunonza communal dils 31 d'october 2014 vegn prelegius ed approbaus unanimamein.

### 3. Elecziuns communalas per la perioda d'uffeci 2015-2016

Cunquei che Orlando Vincenz e Beat Meier han buc acceptau l'elecziun dils 31 d'october 2014 ein ils dus posts en la suprastonza communal aunc adina vacants. Guido Sgier dalla cumissiun da gestiun ha contactau differentas personas per motivar da surprender in post ella suprastonza communal. Arno Capaul e Tarcisi Dietrich ein sedeclarai promts da star a disposiziun per quell'incumbensa.

Per l'elecziun dils dus suprastonts communal vegn giavischau negin scrutini.

#### **Elecziun dalla suprastonza communal**

|                              |                  |                     |
|------------------------------|------------------|---------------------|
| Obteniu vuschs ed elegi ein: | Arno Capaul      | elegius unanimamein |
|                              | Tarcisi Dietrich | elegius unanimamein |

Ord il motiv che Orlando Vincenz ha buc priu encunter l'elecziun sco suprastont communal sa el vegnir reelegius sco substitut dalla suprastonza communal.

#### **Elecziun dad 1 substitut per la suprastonza communal**

|                               |                 |                     |
|-------------------------------|-----------------|---------------------|
| Obteniu vuschs ed elegius ei: | Orlando Vincenz | elegius unanimamein |
|-------------------------------|-----------------|---------------------|

Cunquei che Arno Capaul fageva part alla cumissiun da baghegiar eis ei da prender avon in'ulteriura elecziun. Per il post vacant ella cumissiun da baghegiar vegn Leo Blumenthal proponius.

#### **Elecziun dad 1 persona per la cumissiun da baghegiar**

|                               |                |                     |
|-------------------------------|----------------|---------------------|
| Obteniu vuschs ed elegius ei: | Leo Blumenthal | elegius unanimamein |
|-------------------------------|----------------|---------------------|

#### **4. Presentaziun ed approvaziun dil preventiv communal 2015**

Il **quen communal** muossa sco usitau las numerusas spartas nua che la vischnaunca ei engaschada, per tgei ch'ils mieds finansials vegnan impundi e cun tgei entradas ch'ins quenta. Sco mintg'onn ei la gronda part dallas expensas pli u meins definadas, quei entras cunvegnes, contracts ni leschas. Aschia resta alla fin el quen current mo ina pintga part da cuosts che sa vegnir influenzada activamein per migliurar il quen final.

Il **quen current 2015** siara suenter expensas da frs. 1'283'250.00 ed entradas da frs. 1'200'550.00 cun in surpli d'expensas da frs. 82'700.00. Amortisaziuns ordinarias sin la facultad administrativa vegnan pridas avon ell'altezia da total frs. 190'000.00.

Il **quen d'investiziun 2015** siara suenter expensas da frs. 980'000.00 ed entradas da frs. 150'000.00 cun investiziuns nettas da frs. 830'000.00. Las pli impurtantas investiziuns egl onn 2015:

- sanaziun dil tetg dalla casa da scola
- sanaziun vias da quartier
- investiziuns plan general dall'aua GWP
- investiziuns plan general d'allontanament GEP
- sanaziun dalla tegia Alp Sura

**Il preventiv 2015 sco era il quen d'investiziun vegnan approvai unanimamein.**

#### **5. Fixaziun taxas turisticas**

Ella radunonza communal dils 13 da zercladur 2014 ei la lescha turistica vegnida approvada. Uss ston las ordinaziuns executoricas aunc vegnidas tractadas. Quei vul gi che las taxas ston aunc vegnir definadas. La suprastonza communal fa la proposta da fixar las taxas minimalas. Ord miez dils vischins fa Guido Sgier la proposta da prender las medemas taxas sco quei che Breil e Vuorz han fixau. Cun ils daners ch'ei detti lu surpli seigi pusseivel da porscher zatgei dapli als jasters.

Il vischins han priu enconuschientscha dallas duas pusseivladads.

**Votantas e votants han approvau las taxas minimalas cun 9 encunter 5 vuschs.**

#### **6. Fixaziun dil pei da taglia 2015**

Il pei da taglia actual munta a 125% dalla taglia cantunala semplia. Muort las investiziuns previdas sco sura menziunau eis ei buca previu da sbassar il pei da taglia. La suprastonza communal fa consequentamein la proposta da schar il pei da taglia sin 125% dalla taglia cantunala semplia.

**Unanimamein vegn concludiu da fixar il pei da taglia sco tochen dacheu sin 125% dalla taglia cantunala semplia.**

#### **7. Varia**

Sievi Sgier informescha davart la sesida cun la suprastonza communal da Vuorz en connex cun la fusiun. Il proxims pass en connex cun la fusiun ein dad elaborar ora cun sustegn dad in coach in project da fusiun cun Breil ed in cun Glion.

Finiziun dalla radunonza allas 21:20

Andiast, ils 5 da december 2014

Il president:

L'actuara:

Sievi Sgier

Silvia Calzaferri